



Pablik Woks Dipatmen

# Sosol mo Envaeromen Sefgad Trening Kaed blong ol kontrakta





This document was prepared by Public Works Department (PWD) a branch of the Ministry of Infrastructure and Public Utilities (MIPU)

Approved by

Junior Shim George  
Acting Director, Public Works Department  
Ministry of Infrastructure and Public Utilities

**This version: 1.0**

Prior to this version: N/A

VERSION

Date Issued:

01.00

27/06/2017





Lelepa komuniti long Efate Ring Rod

## Konten

Fowod .....	3
Introdaksen.....	3
Modiul 1: Helt mo sefti long ples blong wok.....	5
Modiul 2: Lukaot long envaeromen .....	13
Modiul 3: Jenda (man o woman).....	19
Modiul 4: Lukaot gud ol pikinini.....	25
Modiul 5: Disabiliti .....	29
Modiul 6: HIV/AIDS mo rod .....	33
Modiul 7: Klaemet Jenis mo Disasta Manejmen.....	37
Apendises .....	41
Akronim .....	42
Mining blong sam wod.....	43
Ki kontakts .....	44





---

## Fowod



Ol sosel mo envaeronmen sefkad modiul i bin develop folem osel mo Envaeronmen Sefkad Fremwok and insert (SSF) blong Ministri blong Infrastrakja mo Pablik Utiliti (MIPU). Ol modiul ya oli developem blong kaedem wok blong PWD taem hemi bildim ol rod blong yumi mo ol narafala infrastrakja projek. SSF hemi stat wetem tingting blong “no spoillem envaeronmen mo olgeta pipol we i liv long hem”. Ol infrastrakja projek oli kam wetem ol gudfala benefit blong hem be long sem taem yumi mas save se ikat long nogud saed blong hem tu we i save afektem laef blong pipol mo envaeronmen blong hem. blong katem daon ol nogud saed blong ol projek ya, olisosel mo envaeronmen sefkad modiul ya oli kam blong adressedem mo impruvum aweanes long PWD mo ol kampani we oli bildim rod mo olgeta komuniti we rod i pas long ples blong olgeta.

Junior Shim George  
Acting Director  
Pablik Woks Dipatment  
Infrastrakja mo Pablik Utiliti (MIPU)

---

## Introdaksen

Kaed buk ya oli developem blong ol staf blong PWD oli usim speseli ol Komuniti patnasip ofisa, blong kivimaot aweaness mo trening long ol komuniti mo kontrakta abaot ol sosel mo envaeronmen problem we wok blong rod hemi kosem long ol pipol mo envaeronmen. Kaed buk ya hemi kontenem seven modiul mo hemi inkludim:

- Helt mo sefti long wok ples
- Envaeronmen proteksen
- Jenda ( man o woman)
- Lukaot gud long ol pikinini
- Disabiliti
- HIV/AIDS mo rod
- Klaemet jenis

Kaed buk ya hemi kivim tu ol wei blong usum blong kivimaot aweanes folem save mo risos we ofisa hemi nidim.

Mein kol blong PWD blong developem kaed buk ya hemi blong mekem sua se bifo wan kontrakta o komuniti i statem wok, hemi mas karem ol trening ya. Trening ya bambae i help blong promotem ol eria olsem jenda mo disabiliti mo kivim mo aweaness long ol problem we wok blong rod i save kosem long komuniti. Experiens blong PWD bifo i soem se wok blong rod hemi save afektem laef blong pipol mo envaeronmen. Ol modiul ya oli developem blong hemi save adrese problem ya long kontex blong wanwan komuniti.





# Helt mo sefti long ples blong wok

## Wanem we istap long pat 1

### Helt mo sefti long wok mo ples blong wok

- Ol impoten helt aksen
- Ol impotent sefti aksen
- Ol impotent sefti ikwipmen

### Ol sefti saen long taem bong wok mo sef trafik kontrol

- Putum aot ol saen blong Trafik
- Kontrol blong trafik mo sefti

## Ol samting blong lanem

- Bae yu lanem ol impotent samting blong sefti long wok.
- Bae yu lanem wanem blong mekem long ples blong wok blong yu i sef.
- Bae yu lanem wanem samting i sef blong mekem long ples blong wok.
- Bae yu lanem ol gudfala fasin blong yusum ol saen blong rod long taem blong wok.
- Bae yu lanem ol fasin blong kontrolem trak long taem blong wok long rod.

## Introdaksen

Sefti long ples blong wok hemi impotent long yumi everiwan. Hemi wok blong yumi everiwan blong:

- lukaot gud yumi evri taem
- talemaot ol fasin we i no stret long man mo woman we i lukaot yumi long taem blong wok
- folem ol gudfala fasin blong sefti evri taem.

Pablik Woks Dipatmen (PWD) istap raetem wan buk long saed blong Helt mo Sefti long ples blong wok.



**Sefti long ples blong wok hemi impotent long yumi everiwan. Hemi wok blong yumi everiwan.**

## Helt mo Sefti long wok ples

### Ol impotent aksen long saed blong helt

- Mas kat inaf klin wota blong drink blong ol man mo woman long ples blong wok.
- I mas gat seperet toilet blong ol man mo woman kolosap long wok ples.

- Mas kat gudafala ples blong spel mo haet long ren mo san.
- No mas fosem ol man mo woman blong wok long rabis taem olsem long bigfala ren mo taem we win i strong tumas.



Temporari kamp we ol community i bildim lo eria blong wok lo East Ambae




Bush toilet blong ol wok man kolosap long ples blong wok, Ambae

## Helt mo sefti long wok ples

### Ol impotent aksen long saed blong sefti

- Ol supavaesa we i lukaot ol wokman mo woman long ples blong wok i mas kat save blong givim “Fes Aid Kea” taem wan i kasem kil.
- Ol Supavaesa i mas save hospital o klinik we istap kolosap mo hao blo kasem wan ambulance o transport.
- No mas drong, drink kava o smokem maruana long taem blong wok o bifo yu statem wok.
- Mas karem gudfala trening blong yusum ol masin blong wok.



## Jekem ol wok.



Antap: Dorinda Uguna, PWD Provinsol Komuniti Patnasip Ofisa blong SANMA hemi jekem ples blo wok blo wan CBC .



Antap: Seth Simeon (raet saed), PWD Provinsol Komuniti Patnasip Ofisa blong MALAMPA hemi jekem ples blo wok blo wan CBC.



Antap: Peter Jeremiah, PWD Provinsol Komuniti Patnasip Ofisa (metel) hemi visitim ol komuniti blong North Tanna.



### Ol sefti ikwipmen

- Oltaem, i mas kat “Fes Aid” box long ples blong wok.
- Putum ol gudfala klos blong wok everitaem olsem:
  - sefti boot
  - ol yelo o orenj sefti klos we igat riflekta (saen saen mak) lo hem
  - hat taem san i hot
  - ol glas taem yu wok long rod we i kat tumas das
  - ol hand klap taem yu katem mo karemaot ol samting we i save blokem rod
  - wearem ol strong hat o helmet taem yu wok long ples we ol samting i save foldaon olsem long rod blong wota, digim toilet o long ples blong karem ol ston blong berem rod.

### Ol spesel sefti aksen taem yumi digim rod blo wota

Mas yusum ol sefti aksen ia sapos yu digim ol rod blong wota i ron long hem olsem ol kalvet. Fulap taem ol spes oli smol mo hemi no isi blong digim ol rod blong wota i pas long hem long saed blong hil. Hemia i dipend tu long ol kaen graon we yumi kat mo hamas yumi wandem digim i ko daon. Sam taem bambae yumi nidim blong bildim ol wol long saed saed blong rod blong wota we yumi wandem digim mo sapotem ol wol ia blong oli no foldaon (“strutting”) mo hemi nidim ol stret man we oli save bildim ol wol ia.

### Exampol blong ol sefti kia blong wok



IBC kontraktar long Port Vila hemi werem ol sefti kia long ples blong wok



Ol CBC kontrakta long Efate Ring Rod we oli werem ol sefti kia

## Ol sefti saen mo gudfala kontrol blong ol trak long taem blong wok

Long ples we wok istap long hem, ol gudfala fasin blong lukaot yu i mas stap blong katem daon namba blong aksiden:

- putumaot ol saen long rod long taem blong wok nomo
- setemap ol aksen blong kontrolem ol trak long taem blong wok.

Ol saen ia i soem long ol draeva se wok istap gohed mo ol trak i shud ron slo from sefti blo ol man mo woman we oli stap wok lo rod.

### Putumaot ol saen

Ol saen we i no save stap oltaem bae i helpem ol draeva blong ron slo long ples we i kat wok i kohed long hem. Putumaot ol saen ia fastaem bifo yu wok mo long taem blong wok .

Yu mas save olgeta samting ia taem yu stap putumaot ol saen long rod we yu save karemaot bakeken:

- ol saen ia i mas klia gud long ol draeva.
- ol saen we bambae oli stap longfala taem i mas strong mo bae ol man mo woman we oli wokabaot long rod i no mas karemaot taem wok i stap gohed.



### Impoten

Yu mas putumaot ol saen fastaem bifo yu stat wok mo karemaot taem wok i finis.

- ol saen we i stap sot taem nomo i mas stap long stret ples mo yu save muvumaot taem wok istap kohed.
- ol saen ia i mas klia long ol draeva mo i mas stap klin oltaem.

## Samfala Saen blong putum long rod





### Kontrol mo sefti blong ol transpot

Hemi wok blong ol kontrakta blong lukaot long wokman mo woman mo olgeta we oli yusum rod. Taem we wok istap kohed long rod o kolosap long rod, yu mas tekem olgeta aksen ia:

- mekem sua se yu putumaot ol stret saen long ples blong wok taem we wok i stap kohed
- ol ikwipmen mo ol trak i mas stop long we long rod o bifo ol saen we i showem se wok istap kohed long rod
- no mas putum ol samting we i save kosem aksiden long rod o kolosap long rod long ples blong wok mo ples blong wok i mas klin oltaem
- lukaot gud long ol hol we yu digim from sefti blong ol man mo woman we i yusum rod, ol ikwipmen mo olman mo woman we i wok long rod
- olgeta we i wok long ol masin ia oli mas kasem trening
- olgeta we i wok long ol masin ia oli mas save wanem aksiden we i save happen mo hao blong wok wetem ol masin ya mo olgeta we oli wok kolosap long ol masin ia
- kontrolem gud ol trak mo no mas sloem daon o stopem olgeta we oli yusum rod

- taem wok long saed blong rod i no finis mo ples i tudak, putum ol laet blong talemaot long ol man, woman mo ol draeva o blokem gud ples we wok ino finis long hem yet
- ol ples blong wok i mas klin mo karemaot ol toti taem wok i finis.

Blong lukaot gud long olgeta man mo woman we oli wok long rod mo no sloem daon trak long rod, mekem olgeta samting ia olsem pikja lo nekis pej, pej 12:

- putum tu saen we i talem “Workers Ahead” o yello o orenj flak long saed blong rod samples 200m bifo ples we wok istap long hem mo afta long ples we wok i finis long hem
- putum saen we i talem se rod i smol samples 100m bifo ples we wok istap kohed long hem.


From sefti blong ol wok man mo woman we oli stap klinim rod, olgeta man mo woman ia oli mas warem sefti vests mo putumaot ol trafik kons long rod blong slowem daon trafik.

### Exampols blong wan ples blong wok long saed blong rod



OI CBC kontrakta we oli werem ol sefti ves mo oli putumaot ol trafik kon blong kontrolem trafik

**Wei blong putum olgeta saen**





I mas kat ol saen long tugeta end blong rod blong ples blong wok blong talemaot long olgeta we i stap yusum rod ia se wok istap kohed long ples ia mo ol trak i no spid tumas.

Samfala taem, yu save talem ol draeva i yusum narafala rod mo no pas long rod we wok i stap kohed long hem.

Afta we yu jenisim rod blong ol trak i pas long hem mo bifo wok i stat, putumaot ol woning saen mo ol kon raonem eria we wok bae i stap long hem. Putum olgeta saen ia long oda ia;

- putum “Workers ahead” saen samples 200 mita bifo ples we wok bambae istap long hem
- putum “Turn Left/Right” arro samples 100 mita bifo ples we wok bambae istap long hem
- putum ol kon i krosem rod i ko long ples we ol trak bambae i pas long hem taem wok i stap ko hed
- putum “ keep left/ right” aro long tugeta saed we ol kon i finis long hem

- ol toti i mas stap narasaed long laen blong ol kon
- putum “End of Restriction” saen long end blong rod we ol trak bambae i pas long hem long taem we wok istap kohed
- long naet, putum ol yellow laet blong makem longfala blong rod, long ples we ol trak bambae i pas long hem taem wok istap ko hed.

### Manejmen blong traffic blong ol Komuniti kontrakta

Ol komuniti we oli stap karem aot rutin mentenens, hemi impoten se wan saed rod i shud klos long taem blong wok. Yufala i mas putum sam trafik kon lo medel blo rod mo lo saed blo rod we bae yufala i klosem mo wok long hem blong ol draeva oli save se wan saed rod i klos. Yufala i no alao blong wok long tugeta saed blong rod long sem taem. Taem we yufala i klosem wan saed rod, i min se bae wok i hapen long saed blo rod ya we i klos.

## Ki Tingting

- Mas werem ol sefti kia evritaem lo ples blo wok.
- Mas werem sefti boot mo sefti klas taem yu yusum kras kata.
- Mas invest plante long ol sefti kia mo ol ikwipmen blong wok.
- Afta lo wan natural disasta, plis tekem lid blongt kliarem aot ol toti lo rod we i save kosem aksiden olsem ol branj blo wud, ston mo graon.









# Lukaot long envaeromen

## Konten

- Introdaksen.
- Ol damej we i spolem envaeromen mo ol wei blong katem daon ol damej ia.

## Introdaksen

Ol problem long envaeromen mo hao blong lukaot gud long envaeromen hemi stap long wan ripot we oli singaotem “Brundtland Report”. Ol gavman long wol oli raetem plante polisi blong lukaot gud long envaeromen mo blong katem daon ol damej we hemi kamaot taem yumi stap develop.

Hemia i semak nomo taem yumi bildim rod we i save kat no gud samting long ples blong yumi mo yumi mas lukluk gud long hem.

Long Vanuatu, gavman i pasem loa blong envaeromen long 2002 blong helpem yumi blong lukaot gud long envaeromen mo risos blong yumi. Dipatmen blong Envaeromen nao hemi lukaot long loa ia.

Long loa blong envaeromen we Gavman i saenem long 2011, rod konstraksen hemi wan wok we i mas kat stadi long hem blong mekem sua se yumi no spolem envaeromen. Stadi ia oli kalem “Preliminari Impak Asesmen” mo hemi wok blong Dipatmen blong Envaeromen blong karemaot. Sapos risalt blong stadi ia i soem se bambae i save kat bigfala damej long envaeromen, bambae i mas kat wan narafala stadi we oli kalem “Envaeromen Impak Asesmen”. Risalt blong stadi ia i mas stap long wan ripot mo afta we Direkta blong Dipatment blong Envaeromen i saenem, developmen ia i save tekem ples. Hemia wan wei blong Gavman i skelem gud mo lukaot gud long envaeromen from ol damej we ol developmen i save kosem.

Darekta blong Envaeromen i givim raet long olgeta ofisa blong Dipatmen blong Envaeromen blong karemaot ol Preliminari Impak Asesmen bifo yumi save bildim ol rod.

1. Brundtland Report emi wan ripot we Wol Commisen blong Envaeromen mo Developmen (WCED) emi bin mekem long 1987, mo emi bin startem ol miting blong sastenabol developmen long wol (start long Rio de Janeiro lo Brazil). Oli bin produsum wan wol aksen plan blong sastenabol developmen we oli kalem Agenda 21 kasem 1997 Kyoto Protocol. Ripot ia emi talemaot se mining blong “sastenabol developmen” emi “developmen we emi mitim nids blong yumi tedei beh emi no spolem janis blong fiuja genereisen blong oli mitim ol nids blong olgeta.””

## Wanem blong lanem

- Save se wanem we istap spolem envaeromen hemi stap long evri ples long wol mo long Vanuatu.
- Save ol loa blong envaeromen long Vanuatu mo wanem blong mekem blong lukaot gud envaeromen.
- Bildimap save long wanem samting we i save spolem envaeromen taem yumi bildim ol rod.
- Bildimap save long ol tingting blong daonem ol problem ia long taem yumi bildim rod.



**Sastenabol developmen emi developmen we emi mitim ol nids blong yumi tedei - be hemi no spolem janis blong fiuja jeneresen blong oli mitim ol nids blong olgeta tu.**

*Brundtland Report 1987*



**ECO 2.4 – Yumi mas putum ol klia gavman system blong infrastrakja, wetem ol loa mo standad blong mekem se hemi**

**infrastrakja we resilient (no save damej long ol disasta) mo yumi save maintenem.**

**ECO 2.5 – Yumi mas impruvum ol patnasip mo ol wei blong usum ol risoses blong yumi blo mekem sua se ol wei ia emi no kostem yumi tumas mo hemi sastenabol blong manajem mo maintenem ol propeti blong yumi.**

Ekonomi Gols mo Polisi Objektiv: Vanuatu 2030 Plan blong ol Pipol (Vanuatu Nasonal Sastenability mo Developmen Plan 2016 – 2030)



Lanslaed long Forari, Efate Ring Rod.



Erosion long Devil's Point Rod, Efate.



### Samting we i save happen taem yumi bildim rod mo ol aksen we yumi save mekem blong daonem ol damej long envaeromen.

Envaeromen hemi wan samting we fulap long ol kontrakta i no ting hevi long hem mo aksen blong olgeta i save spolem envaeromen mo sapos yumi no katem daon mo kontrolem ol fasin ia bambae yumi damejem envaeromen blong yumi..

Ol **nogud** saed we i save tek ples taem yumi bildim rod:

- tumas wota i save ron long ren taem mo rod i save jenisim wea ples wota i save ron i ko long hem
- bambae i kat jenis long wei we yumi yusum graon
- graon bambae i nomo strong mo wota i save wasem aot graon isi nomo long ren taem
- ol toti smok we i kamaot long ol trak bambae i mekem win i toti moa
- bambae i kat moa noes
- bambae i kat problem long ol wota saplae mo olgeta samting we oli laef long ol wota ia
- bambae i kat tumas ol hol we yumi dikimaot ol ston blong berem rod long hem
- bambae i nomo kat ol tik bus mo olgeta animol we oli laef long bus
- bambae i kat denja blong spolem ol tabu eria, lo tik bus

mo ol tabu eria long solwora

- bambae i kat fulap man mo woman i stap long wan smol eria, spes bae i smol mo samfala man mo woman i save muvaot i ko long narafala ples.

Blong mekem se yumi katem daon ol problem ia taem yumi bildim rod, yumi mas putumaot ol aksen blong no spolem envaeromen long ples we wok i ko hed long hem long rod.

Ol aksen blong lukaot gud long envaeromen long ples we wok i kohed long hem long rod i kat tufala gudfala saed blong hem:

- i lukaot gud rod mo i no nidim fulap mane long fixim ol rod
- i blokem ol damej long rod

Olsem wan kontrakta, hemi wok blong yu blong mekem sua se yu folem ol aksen ia blong lukaot gud long rod we oli stap long kontrak blong yu. Hemia i blong mekem sua se yu mekem wan gudfala wok.



Rod we i krosem Maret River long Malekula.



Sanbij ova long rod long Dry Creek, kolosap long Eton Vilij, Efate.

## Samfala envaeromen problem blong ol wok long rod, mo samfala solusen blong olgeta problem ia.

### Kliarem bus mo katem ol wud long saed blong rod.

- ✓ Kliarem ol bus mo katemaot ol wud nomo long ples we i flat.
- ✓ Katemaot ol wud nomo we oli makem mo oli agri blong katemaot.
- ✓ No spolem ol karen sapos komiuniti i no kivim raet blong mekem.
- ✓ No mas bonem ol toti – putum olgeta toti long stret ples blong hem sapos no kat, berem olgeta long wan hol

### Ol hil we i no kat ol tri, bus o kras i gro long hem, bae ren i wasemaot ol graon ia.

- ✓ Sakem graon o berem ol hil long saed blong rod we ren i save wasemaot.
- ✓ Planem ol gras long l hil long saed blong rod.
- ✓ Bildim ol ston wol i ko insaed long drenej mo ol kalvet.
- ✓ Bildim ol gudfala drenej long hill saed blong wota i no save wasemaot long taem blong ren mo strong win.
- ✓ Katem ol smol klif we i stanap stret long ples we wota i ron long hem, ol kalvet mo mekem i flat lelebet.

### Ol no gud fasin blong sakem toti long ples blong spel long taem blong wok.

- ✓ Berem ol toti long ol hol mo mekem sua se yu kavremap hol ia taem i fulap mo taem yu muvaot.
- ✓ Dikim ol toilet long ples blong wok mo kipim olgeta i klin mo klosem gud olgeta taem oli fulap o taem wok i finis.

### Ol gud fasin blong mekem taem yu jenisim oel mo ol kris blong masin.

- ✓ Putum ol oel blong ol masin blong wok long ol dram.
- ✓ Lukaot se ol oel olsem masut mo bensin i no ronaot o lik olbaot.
- ✓ Ripearem gud ol masin we i save lego ol oel o kris.
- ✓ Putum gud olgeta pat blong ol masin we yu jenisim olgeta olsem ol filta blong masin.



Efate Ring Rod.



Saot Santo Rod.



Neilep Bridge, Efate Ring Rod.



### Fasin blong sakem toti long ol riva o ples we ikat kat wota.

- ✓ Mekem sua se ol toilet istap long we long ol riva o ples we i kat wota.
- ✓ No mas sakem ol hafhaf simen o wasem ol tul blong wok long riva.
- ✓ No sakem ol toti long riva.

### Ol toti smok mo dast.

- ✓ Sakem wota long graon o rod we ikat tumas das long hem.
- ✓ No bonem eni samting long eria blong wok.

### Putum bak gud ples blong kARRIERE.


- ✓ Karemaot wota long we yu digim kuari long hem from wota i save fulap long hem mo bae i sting.
- ✓ Katem ol smol klif long kwari i flat lelebet.
- ✓ Putum bak kraon we yu dikimaot iko ko bak long hol blong kuari. Graon we yu digim aot long hol blong kuari.



Temporari rod long river we i ovaflo, Maret River, Malekula

## Ki Tingting

- No bonem ol samting wetem faea.
- Karemaot ol toti long eria blong wok - no bonem toti mo no leko toti istap.
- Karemaot evri toti blong grass mo sakem long wan stret ples.
- Rispektem wota (riva, or wota saplae) we olgeta long komiuniti oli stap usum no wasem ol tool blong wok long riva, no sakem oel o nara toti long riva, mo ol toilet oli no mas stap kolosap long riva



Efate Ring Rod.





Oi woman supavaesa we oli atendem sosel mo envaeromen sefkad trening long Lo Senta, Ist Ambae



# Jenda (man o woman)

## Konten

- Ol difren wei we man o woman hemi save muv araon mo kasem seves.
- Ol ki tingting mo rul blong jenda long Vanuatu.
- Problem blong jenda long wok ples.

## Ol samting blong lanem

- Toksave long ol diferen wei blong kasem samting mo muv long wan ples i ko long narafala ples.
- Bildimap save long ol tingting o bilif se man mo woman i semak.
- Toksave long ol wok blong man mo woman we oli karem kontrak blong wok.

## Introdaksen

Ol tingting se man mo woman i semak mo i kat semak raet hemi impotent long ekonomik mo sosel developmen tedei. Kivim semak janis long man mo woman long laef hemi wan tingting we fulap kaontri long wol istap toktok from mo mekem.

### Ol difren wei we man o woman hemi save muv araon mo kasem seves

Man mo woman i fesem laef long ol difren wei mo oli kat ol difren kaen nid. Yumi mas save se ol nid blong man mo woman i difren mo mekem sua se olgeta developmen blong yumi i mas addresem ol nids ya. Gudfala rod hemi inkrisim akses mo hemi alaom woman mo ol gel blong oli save muv araon blong kasem olgeta seveses. Hemi also minim se ol woman mo ol gel oli save kat taem blong kasem skul, hospital, ol sosel aktiviti mo save mekem maket o smolsmol bisnis blong winim mani.

Ministri blong Infrastraja mo Pablik Utiliti hemi stanap strong blong kivim wok we i no ko agensem raet blong wan man, woman mo ol gel.

### Ol difren wei we man o woman hemi muv araon

Long saed blong muvmen mo transpot, samfala difren wei we ol woman mo ol gel long ol rurol eria oli muv hemi:

- ol woman mo ol gel oli spendem fulap taem blong olgeta blong karem ol samting long wan ples i ko long narafala ples olsem wota mo faea wud i ko long haos
- ol woman mo ol gel oli no kat fulap janis blong oli ko long ol klinik/hospital mo ko long skul o karem ol trening
- ol woman mo ol gel oli fesem fulap problem taem oli muv long wan ples i ko long narafala ples
- ol woman mo ol gel oli no kat kontrol long fulap samting long laef
- i no isi blong ol woman mo ol gel i kasem help long klinik we hemi impoten long olgeta blong bonem pikinini.



# 72%

**Blong ol woman long Vanuatu oli fesem fisikol mo seksuol abius long laef blong olgeta<sup>2</sup>.**



# 36%

**Blong ol woman oli kasem pei from oli wok long fomol sekta long vanuatu<sup>3</sup>.**

<sup>2</sup> Vanuatu Women's Centre, 2013. Additional data analysis from the Vanuatu Women's Centre's National Survey on women's Lives and Family Relationships. Port Vila: Vanuatu Women's Centre.

<sup>3</sup> Source: UN Women and the Asia Pacific website: <http://asiapacific.unwomen.org/en/countries/fiji/co/vanuatu>

## Ol ki toktok mo rul blong jenda long Vanuatu

Gavman blong Vanuatu hemi saenem wan agrimen we i protektem ol woman long ol rabis fasin. Agrimen ia oli kolem *Convention on the Elimination of All Forms of Discrimination Against Women (CEDAW)* long 1995.

Toktok ia "Gender Equality" hemi bin stap long nasional plan blong Gavman we oli kolem "Priority Action Agenda 2012 – 2016". Tingting hemi blong kivim semak raet long ol man, woman mo ol gel long olgeta polisi blong Gavman.



**Stamba tingting blong polis ia hemi blong promotem semak raet long ol man mo woman mo kivim moa pawa long woman.**

### Ol stamba tingting hemi

- 1.** Blong mekem se i kat semak namba blong ol boe mo ol gel long praemari, sekondari mo univesiti skul.
- 2.** Bildimap namba blong ol woman mo ol gel long ol wok we oli save kasem salari long ol narafala wok be i no long agrikalja nomo .
- 3.** Bildimap namba blong woman mo ol gel blong wok long gavman mo save mekem ol disisen



Antap:: Ol woman long Tanoliu komuniti we oli tekem pat long wok blong komuniti kontak




Antap: Ann Tosiro, PWD Sinia Komuniti Patnasip Ofisa (SCPO) hemi tijim sosel mo envaeromen sefgad long Lo Senta long ist Ambae



### Problem blong jenda long wok ples

- Kivim semak janis blong mekem gud ol rod blong ol woman mo ol gel we oli save kasem smol selen.
- Mekem sua se ol wok blong rod ino blokem ol woman mo ol gel blong kasem wota mo no mas spolem ol ples we oli save krosem rod long hem.
- Fasin blong man o woman i salem bodi from mane i save kam antap long ol eria we wok iko hed long hem from ol wok man o woman oli stap long taem tumas long ol family blong olgeta. Ol man we oli karem kontrak oli mas kontrolem gud olgeta long ol fasin ia.
- Mekem ol aweanes long ol woman mo ol gel olsem wanem HIV/AIDS mo ol narafala STI i save pas long wan man, woman mo gel i ko long narafala man, woman.
- Pem ol woman from wok we oli mekem i ko long akaon blong olgeta long bank blong katem daon namba blong faet long haos o man i fosem ol woman blong usumap evri mane.
- Ol woman i mas karem semak mane from semak wok we oli mekem wetem ol man.
- Ples blong wok i mas sef oltaem long ol woman. Toilet blong ol woman tu i mas sef oltaem mo i mas stap long sef ples mo long wei long pablik.
- Ol woman mo ol gel i mas kat ples blong kasem ol infomesen o help sapos oli kasem ol no gud toktok long ol man we i toktok no gud long olgeta mo kilim olgeta.
- Enkarejem ol woman mo ol gel blong oli tekem pat long ol wok blong komuniti kontrak.



**“Taem we man mo woman i kat semak raet, sosaeti hemi prosa. semak raet blong ol woman hemi developmen blong yumi evriwan”.**

Former UN Secretary-General  
Ban Ki-Moon



Antap: Dorinda Uguna, Provinsol Komuniti Patnasip Ofisa (PCPO) blong Sanma hemi vistim ples blong wok blong ol komuniti kontrakta.





Tanolu komuniti istap mekem wok blong komuniti kontrak long Efate Ring Rod.



Oi woman we oli wok long komuniti kontrak long Malekula.



## Jeklis blong kivim janis long ol woman blong wok

- Kivim semak wok we i kat semak pei long ol man mo woman
- No kivim wok folem jenda
- Kivim semak trening long ol man mo woman.
- Hemi tabu blong man i toktok nogud o mekem wan rabis fasin long ol woman long wok ples..
- Enkarejem woman blong i kasem trening blong leftemap hevi samting.
- Yu no usum jenda blong rikrutum ol wokman blong yu.
- Kivim semak tul blong wok long ol man mo woman.
- Alaom ol woman blong tekem pat long kontrak wok blong yu
- Enkarejem ol woman blong tekemap lidasip rol long wok.
- Mekem sua se ikat gudfala toilet blong woman i usum long taem blong wok.



Evri wok ples i mas kat sepret toilet blong ol man mo woman .

## Ki Tingting

- Man mo woman hemi mas kasem semak trening.
- Ol woman oli mas karem pei from ol wok we oli mekem.
- Ol woman oli mas tekem pat blong mekem ol disisons.
- Kivim semak janis long ol man mo woman blong kasem niu skil tru long trening.
- No toktok nogud o mekem wan rabis fasin long ol woman long wok ples.







# Lukaotem gud ol pikinini

## Konten

- Ol bigfala toktok.
- Ol stamba tingting blong lukaot gud long ol pikinini.
- Ol stret fasin blong wok wetem help we i kam long Ostrelia.

## Wanem blong lanem

- Lukaot long pikinini from ol denja long rod.
- Save gud olgeta loa blong lukaot long ol pikinini.
- Save gud ol wok mo wanem blong mekem anda long ol loa ia.
- Save gud ol stret fasin blong ripotem ol kes we i happen long pikinini long ples blong wok wetem ol wokman mo ol kontrakta.

## Introdaksen

Wanem nao olgeta problem we ol pikinini oli save kasem long wok blong rod?

- Ol pikinini we yumi mekem olgeta blong wok we yia blo olgeta ino naf blong wok.
- Ol kil we yu kasem long ples blong wok we i no sef.
- Ol kontrakta i faetem o toktok no gud long ol pikinini.
- Ol kontrakta mo ol wok man o woman i mekem trabol long pikinini.

Wanem nao ol wok blong yumi blong katem daon olgeta problem folem olgeta impotent rul ia.

## Ol ki tingting

### ► Ol ki toktok blong no kosem kil o problem

Ol wok we yumi mekem i no mas kosem eni problem o mekem ol pikinini i kasem kil.

### ► Raet blong ol Pikinini

Vanuatu mo Australia i bin saenem wan agrimen we oli singaotem *Convention for the Rights of the Child (CRC)*. Long Vanuatu loa ia oli stap wok long hem yet blong putum everi samting we intanasonal agrimen ia i i tokbaot.


### ► Kalja blong Vanuatu

Long Vanuatu yumi usum kalja mo kastom blong yumi blong dil wetem olgeta problem we i happen long ol pikinini be ino loa. Long kastom fasin blong yumi, olgeta fasin blong dil wetem ol problem long saed blong raet blong olgeta pikinini oli no semak.

### ► Responsibiliti/komitmen

Mane we Gavman blong Ostrelia i kivim, ol kontrakta oli mas folem loa blong raet blong ol pikinini blong gavman blong Ostrelia.

**Go! Lukaotem  
gud ol pikinini  
from ol fasin  
blong wok we  
i no sef long  
olgeta mo ol  
fasin blong  
mekem trabol  
long ol pikinini.**



**“Ol kontrakta we oli yusum ol mane  
we Ostrelia i kivim blong wok,  
oli mas folem ol rul blong lukaotem  
gud ol pikinini folem standad  
blong Ostrelia”.**

*Polisi blong Ostrelia*



Ol kontrakta we oli kat rabis rikod wetem ol pikinini oli no save wok. Kontrakta we i stap pas long kot from problem wetem ol pikinini bambae oli karemaot kontrak blong hem.

### Jeklis blong lukaot gud long ol pikinini


- Yia blong olgeta we oli wok long rod hemi mas bitim 18.
- Ol pikinini we oli folem papa o mama i kam long wok, oli mas stap long wan sef ples.
- Olgeta saen blong trafik long rod i mas setap fastaem bifo eni wok i save stat.
- No statem wok kasem taem we sefti saen blong soem se 'denjeres wok i stap hapen' i setap finis.
- Yu mas ripotem eni rabis fasin we wan kontrakta o eni man o woman i mekem long pikinini long ofisa blong PWD.
- Yu no karem eni wokman we yia blong hem ino kasem 18.
- Yu mas ripotem eni rabis fasin we lukim i hapen long wan pikinini.

### Komuniti kontrak mo sefti blong pikinini

Evri pikinini o bebe we i folem mama o papa ikam long wok ples i mas stap long wan sef eria mo i mas kat wan man o woman we i stap blong lukaot long hem. Ol pikinini oli no mas ko klosap long eni masin blong katem gras o klosap long eni wok man o woman we i stap katem gras. Olgeta mama we oli kivim titi long ol bebe oli mas kat wan sef ples blong usum. PWD i proposem se komuniti i bildim wan selta wetem lokal materiel o tapolin blong olgeta mama mo pikinini. Selta ya oli save tekemaot mo muvum iko long narafala ples taem wok hemi stap ko.

### Wanem nao responsibiliti blong yumi folem loa ya?

- 1.** Ol Saet Inspekta, ol staff blong PWD mo ol Komuniti Kontrakta oli mas karem ol trening long raet blong ol pikinini.
- 2.** Mekem sua se ples blong wok hemi sef long ol pikinini.
- 3.** Ripotem olgeta problem we i tek ples long ol pikinini long wok ples long supavaesa blong yu.



**44.6%**  
blong  
Populesen  
blong Vanuatu  
hemi ol pikinini  
we yia blong  
olgeta I stat  
long 0-18 yia

Vanuatu National Statistics  
Office, 2016 data



### Ol stret fasin blong wok wetem help we i kam long Ostrelia

- Respektem ol pikinini. No lukluk long kala, jenda, lanwis, rilijen, wea ples oli kam long hem olsem kaontri o aelan, oli handicap o no kat.
- No mas yusum olgeta rabis toktok o fasin long olgeta pikinini we oli no gud.
- No mekem trabol long ol yangfala we oli no kasem 18 yia yet o yusum mane blong pem olgeta blong mekem trabol.
- Mekem sua se i kat sam papa o mama long ples we wok istap kohed long hem we hemi kolosap long ol pikinini.
- No karem ol pikinini olgeta nomo ikam long haos long yu.
- No silip kolosap long olgeta pikinini. Sapos hemi nid blong yu mas silip kolosap long olgeta pikinini, askem supavaesa blog yu mo mekem sua se i kat sam man o woman istap.
- Yusum gud ol kompiuta, mobael fon, ol kamera mo ol video kamera long saed blong wok be i no spolem olgeta pikinini.
- No mas kilim ol pikinini.
- No karem olgeta pikinini we oli skul blong kam wok.
- Mas wok wetem ol loa blong ostrelia we hemi no alaom pikinini blong i wok from wan amon blong mane.
- Ripotem kwik taem olgeta trabol we i happen long olgeta pikinini.
- Sapos yu bin mekem wan trabol wetem wan pikinini bifo o long taem blong wok wetem Australian Aid mo pas long kot, talemaot ol risalt blong kot.



**Kavman hemi mas protektem ol pikinini long ol wok we i save spoilem laef blong olgeta.**

Article 32, United Nations *Convention on The Rights of The Child*.

### Ki Tingting

- Ol pikinini oli mas ko long skul.
- Mas lukaotem gud pikinini taem hemi kam wetem yu long wok ples.
- I mas kat wan sef eria blong kipim olgeta pikinini mo bebe taem wok hemi stap gohed.
- Sapos ikat eni rabis fasin we i hapen long wan pikinini, yu mas ripotem kwiktaem.







# Disabiliti

## Konten

- Wanem ia disabiliti?
- Sosaeti mo disabiliti.
- Wanem mining blong “Kivim semak janis long man o woman wetem disabiliti?”
- Situesen blong Vanuatu.
- Wok blong Ministri blong Infrastrakja mo Pablik Utiliti mo Pablik Woks Dipatmen long saed blong disabiliti.

## Introdaksen

### Disabiliti i minim wanem?

Disabiliti hemi minim man o woman we hemi kat wan damej long bodi blong hem we yu save luk, long tingting blong hem, olsem wanem hemi tajem or filim samting mo gro ikam antap. Disabiliti hemi happen long wan man o woman taem hemi bon o hemi bon i kam wetem, i save happen taem man o woman istap kam bigwan o eni taem long laef blong hem.

### Sosaeti mo disabiliti

Fulap taem ol man mo woman we oli kat disabiliti oli no stap tekem pat o kam pat blong ol developmen we istap tekem ples long ol komiuniti blong yumi. Hemi i happen from:

- i no kat gudfala ples blong ko long skul o klinik
- i kat smol Janis nomo blong oli faenem ol wok mekem se oli no pat blong wok from mane mo mekem narafala bisnis
- Ol woman mo ol gel we oli kat disabiliti olgeta nao oli no kat plante janis blong kam pat blo ol developmen long komuniti mo ol pipol i lukluk no gud long olgeta.

### Wanem mining blong “kivim semak janis long man o woman wetem disabiliti?”

Bifo i kam yumi bin stap kivim long olgeta we oli kat disabiliti ol spesol skul o hospital we oli impotent be wanem we yumi wandem hemi blong janis long olgeta blong tekem pat long ol aktiviti long sosaeti blong olgeta mo oli kat semak raet olsem yumi nomo. Oli kat semak raet blong mekem bisnis mo ol narafala wok.

Pepos hemi blong tekem olgeta we i kat disabiliti i kam pat blong yumi long sosaeti blong mekem oli tekem pat long ol aktiviti mo kat wan nomol laef. Blong wan man mo woman we i kat disabiliti hemi kam aktif, hemi mas filim se hemi fri blong wokabaot i ko hom afta long wok, long skul mo ol narafala ples. I no mas kat wan samting i blokem ples blong hemi ko long hem mo hemi fil se hemi sef long wokabaot blong hem.

## Wanem blong lanem

- Mekem fulap aweaness abaot ol disabiliti
- Mekem fulap man mo woman i save se ol Disabiliti oli kat semak raet olsem olgeta.
- Mekem ol man mo woman i save wok blong yumi long Vanuatu blong bildim olgeta rod, brij, skul, hospital mo samfala moa we everiwan i save yusum wetem ol man mo woman wetem disabiliti.

Blong mekem o jenisim ol sevis we hemi blong yumi everiwan wetem olgeta man o woman we i kat disabiliti hemi no sas mo hemi wan narafala wei blong luk olgeta olsem pat blong sosaeti blong yumi. Long narafala lukluk, hemia bambae i no solvem tumas ol problem blong man mo woman we i kat disabiliti be hemi aknolejem hem olsem memba blong komuniti.

### Sam eksampol blong ol disabiliti we yu save faenem

- Blaen o no save lukluk.
- Sorae i fas o no save harem samting.
- Kranke o lusum tingting.
- No save andastanem samting.
- Problem blong bren
- Problem blo komuniket wetem ol narafala man o woman.
- Handikap o fisikol damej long body.



**13%**  
blong populesen  
blong Vanuatu i kat  
disabiliti.

<sup>1</sup>2009 National Population and Housing Census, Gender Monograph - See more at: <http://asiapacific.unwomen.org/en/countries/fiji/co/vanuatu#sthash.PbePUICB.dpuf>

## Situasen blong Vanuatu

Vanuatu Gavman tu hemi saen long wan loa blong Unaeted Nesen we oli singaotem *Convention of the Rights of Persons with Disabilities* mo hemi mas mekem sua se ol polisi mo loa blong Vanuatu i mas folem loa ia. Stamba tingting blong loa ia hemi blong promotem, protektem mo mekem sua se man mo woman we hemi kat disabiliti hemi enjoem ful mo semak raet olsem ol narafala man mo woman, semak fridom mo promotem respek long olgeta. Long 2013 Vanuatu hemi joenem ol narafala kaontri long Pasifik mo long Esia blong developem wanem oli singaotem *"Incheon Strategy: Make the Right Real"* or mekem raet hemi kam ril o tru blong olgeta man mo woman we oli kat disabiliti long Pasifik mo long Esia. Hemi wan aksen plan blong folem nomo wanem we istap long Unaeted Nesen Konvensen we yumi save luk ol progress blong olgeta. Folem hemia, Gavman blong Vanuatu i setemap tufala posisesn we oli singaotem *Disability Desk Officers* long Ministry blong Jastis mo Sosol Sevis olsem ol ki kontak blong ol polisi mo olsem wanem blong rolemaot ol polisi ia from olgeta man mo woman we oli kat disabiliti.

## Ol ki infomesen long disabiliti



- ▶ Bitim wan billion pipol long wol, 15% blong populesen ikat sam kaen disabiliti
- ▶ Bitwin 110 mo 190 million man o woman i liv wetem sam fom blong disabiliti long wol.
- ▶ Ret blong man o woman i kasem disabiliti hemi gro bigwan from populesen ikam olfala mo i kosem ol difren kaen sik o kondisen.
- ▶ Ol pipol wetem disabiliti i no kat gudfala akses long helt kea seves mekem se ol helt nids blong olgeta ino solv plante taem.

Source: World Health Organisation., November 2016  
[www.who.int](http://www.who.int)



Kaltong Jimmy hemi kat problem blong no save toktok gud be hemi wok tu olsem wan kontrakta long Efate Rinf Rod.



Noten Simo, we hemi kat problem blong no save toktok gud, hemi memba blong Lelepa komuniti long Efate Ring Rod



## Wok blong Ministri blong infrastrukja mo Pablik Utiliti mo Pablik Wok Dipatmen long saed blong Disabiliti

Olgeta man mo woman we oli kat disabiliti oli faenem i had blong wokabaot olbaot from fulap long olgeta infrastrukja (skul/hospital) oli mekem i no isi blong oli kasem ol pablik mo praevet seves.

Ol infrastrukja servis olsem ol hospital mo skul oli impotent tumas blong mekem laef hemi isi long ol man mo woman we oli kat disability o i save stopem olgeta. Hemi dipen plante long hao yumi bildim ol infrastrukja ia:

- hemi isi nomo blong kasem olgeta o no kat
- oli save disaenem olgeta infrastrukja ia blong everiwan i yusum, ol man mo woman we oli kat semak saes, pawa mo save.
- samfala taem ol ona blong ol infrastrukja ia, ol planna mo ol maneja blong ol seves ia oli kat rabis tingting nomo long olgeta we i kat disabiliti.

Ministri blong Infrastrukja mo Pablik Utiliti hemi stap tekem lid blong mekem olgeta jenis long Loa blong hem olsem loa blong yusum rod (*Road Act*) mo ol loa blong bildim ol haos we ol man mo woman wetem disability i save usum.

- Olgeta man mo woman we istap mekem ol disaen blong ol rod mo bilding li mas lukluk olgeta nid blong olgeta man mo woman we oli kat disabiliti long ol komiuniti blong yumi blong mekem se oli save kasem olgeta seves ia olsem ol skul, stoa mo ol hospital.
- Yumi mas enkarejem mo lego olgeta man mo woman we oli kat disabiliti blong mekem wok long rod.
- Ministri blong Infrastrukja mo Pablik Utiliti hemi stanap strong blong kivim wok we i no ko agensem raet blong wan man, mama gel mo olgeta we ikat disabiliti.

“Enkarejem pipol wetem disabiliti blong developem ful kapasiti blong olgeta blong oli kam independen, olsem kasem wan wok; bambae i ridiusim had taem we ol famli memba or sistas oli fesem blong lukaotem olgeta. Developmen blong disabiliti inklusiviti hemi daonem poveti”.

*Excerpt from Development for All – towards a disability inclusive Australian aid program*

### Ki Tingting

- Ol komuniti memba we oli liv wetem disabiliti oli mas patisipet long komuniti-beis kontrak program.
- Komuniti i save kivim wok we man o woman wetem disabiliti i save mekem
- Kivim janis long pipol wetem disabiliti blong mekem wok from wan amon blong mani.
- No mas talem nogud man o woman we i kat disabiliti.



Chief Pele Nambith, Rory Community, Central Malekula







# HIV/AIDS mo rod

## Konten

- HIV/AIDS: OI Pruf.
- HIV/AIDS long Vanuatu.
- HIV/AIDS mo ol wok blong rod.

## OI Samting blong Lanem

- HIV/AIDS aweanes.
- Bildimap save long HIV/AIDS mo wanem nao Vanuatu istap mekem.
- Bildimap save long HIV/AIDS mo rod konstraksen indastri
- Bildimap save blong ol wokman mo woman olsem ol kontrakta abaot HIV/AIDS

## Introdaksen

### HIV/AIDS: OI pruf<sup>1</sup>

#### Wanem ya HIV /AIDS<sup>1</sup>?

HIV hemi minim *Human Immunodeficiency Virus* we i kilim ted ol “cells” we i blokem bodi blong yumi blong no savekasem ol sik.

Man mo woman we i laef wetem sik ia HIV i minim se bodi blong olgeta i nomo strong blong faetem ol narafala sik.

AIDS hemi narafala stej blong HIV mo i minim nomo se bae hemi isi nomo blong man o woman isave kasem ol sik olsem kansa mo ol narafala sik from se sistem long bodi we i save faet agensem sik oli nomo strong.

#### Hao nao sik ya i pas?

HIV i save pas tru long ol kaen fasin ia:

- Plante kes blong HIV i pas tru long wan man o woman iko long patna blong hem taem hemi silip wetem patna blong hem.
- Long taem blong kivim blad long narafala man o woman.
- Taem yumi serem ol nidil o narafala tul we ikat blad blong HIV long hem.
- Mama we i kat bel i save pasem long bebi blong hem.


Plante kes blong pasem HIV i hapen long ol developing kaontris long wol.

HIV hemi stap tekem lid long olgeta sik we oli kilim man mo woman i ded: 39 million man mo woman i lilv wetem HIV mo 2.1 million we oli kasem long 2013<sup>1</sup>.



**36.7  
MILLION**  
pipol oli liv  
wetem HIV  
long wol.

Source: : UNAIDS/WHO  
estimates



**1.8  
MILLION**  
pikinini oli liv  
wetem HIV  
long wol.

Source: : UNAIDS/WHO  
estimates



**2.1  
MILLION**  
pipol oli  
kasem HIV  
long 2013

Source: : UNAIDS/WHO  
estimates

<sup>1</sup>Sos: WHO Websaet

## Wanem tritmen blong HIV/AIDS?

Antiretroviral Therapy (AT) hemi wan medesin we isave help blong daonem HIV i spred long bodi. Hemia i minim se ikat 3 difren kaen medesin we man o woman we i kat HIV i mas tekem long laef taem blong olgeta. **Meresin ya hemi blong slowem daon vaeras blong HIV blong ino gro hariap.** Sapos ol vaeras blong HIV i nomo kam plante, ol “immune cells” bambae oli save laef long taem mo protektem bodi blong man mo woman from ol narafala sik. Long 2013, kolosap 12 million man mo woman i bin kasem ART long ol pua kaontri. Meresin ia hemi sas tumas mo plante man mo woman wetem HIV i no save kasem. HIV i no save pas long olgeta fasin ia:

- mas kat wan patna nomo mo sapos yu ting se patna blong yu hemi no sef, yusum kondom
- ko karem test long klinik o hospital
- mekem sua se ol blad we bae yu usum oli bin testem finis from HIV
- sakem eni nidil we yu yusum.

## Olsem wan kontrakta, yu mas:

- Rispektem komuniti blong yu blong no kat patna aotsaed long maret blong yu
- Kivimaot infomesen long ol wokman abot HIV/AIDS.
- Toktok wetem supavaesa sapos eni helt problem i hapen lo wok ples
- No talem nogud o gosip abot man o woman we i liv wetem HIV/AIDS sapos hemi kam askem wok long yu.

## HIV/AIDS long Vanuatu

((sos: Global AIDS Repons Progres Ripot 2012: Ripablik blong Vanuatu))

- Vanuatu i kat smol namba blong HIV we oli ripotem long 2002 we i kat 4 woman mo tu man. Las ripot we oli mekem hemi long 2011 mo yumi ting se namba ia hemi big wan moa from ol man mo woman i no ko long jekap.
- HIV/AIDS hemi pas tru long sex taem man hemi silip wetem woman mo hemi no usum proteksten. I kat wan kes nomo we mama i pasem HIV i ko long smol bebe blong hem.
- Vanuatu i kat nasonal AIDS Komiti (NAC) we hemi stap lukluk long hao blong tekem aksen long HIV mo narafala sik olsem STI we hemi pas taem man o woman i silip wetem patna blong hem we i kasem.
- Vanuatu i kat wan Nasonal Stratejik Plan blong HIV mo STIs i stat long 2008 kasem 2012. Ministri blong Helth istap rere naoia blong developem wan narafala Nasonal Stratejik Plan.
- Ol mane blong helpem Vanuatu i tekem aksen blong faetem HIV i kam plante long ol ovasi oganaesesem mo ol help we i kam long Gavman blong Vanuatu mo ol narafala patna hemi smol nomo.
- Yumi no save gud se nasonal program hemi bin wan saksess blong katem daon namba blong HIV o nokat. From smol namba blong ol man mo woman nomo i stap ko testem blad blong olgeta i save minim se i kat fulap narafala man mo woman istap we oli kat HIV.
- Populesen blong Vanuatu i smol tumas mo hemi stap long denja from HIV and hemi gud blong mas mekem fulap awareness mo kampen blong katem daon HIV long Vanuatu.



**Man i liv wetem HIV long Vanuatu**

Source: : Ministri blong helt



**Woman i liv wetem HIV long vanuatu**

Source: :Ministri blong helt



### HIV/AIDS mo ol wok long rod

(Reference: HIV/AIDS Guidelines, District Road Works, The Republic of Uganda, October 2003)

PWD tru long help blong Rod Blong Developmen prokram, i bin lukim se gudfala wei blong lukaotem gud ol rod hemi tru long ol komunitis. Hemia hemi tru from ol benefit we komuniti i save kasem olsem trening, kasem wok, karem mani blong helpem ol memba blo komuniti, hemi no sas mo hemi karem tugeta ol man mo woman mo olgeta pipol we oli kat disabiliti.

HIV/AIDS hemi kosem plante negatif fasin long ekonomik growt long wol. Wetem developmen blong ol rod blong yumi, pwd hemi wantm se ol negatif fasin ya bambae oli no afektem komuniti.

PWD i save se ol ples blong bildim rod hemi aktif oltaem from ol difren pipol we oli kam long ol difren bakgraon blo kivim sevis long ples blong wok. Ol pipol ya ikat:

- ol kontrakta mo supavaesa
- ol wokman blong provins, bisnis man mo woman
- olgeta blo salem kakae olsem ol mama
- ol komuniti memba we oli usum rod.

Oltaem ol komuniti memba we oli lukaotem wok nao oli kat problem. Samtaem oli save askem blong silip wetem wan patna we hemi wan wokman long rod from wan amon blong mani. Fasin ya hemi nogud from se hemi no tingbaot helt blong wan man o woman. Taem we wan long tufala patna hemi kat sik ya, hemi save pasem long patna blong hem mo sik ya i save spred i kam bigwan long komuniti.

Ol fasin olsem isave kosem problem blong yangfala gel ikat bel be tati blong bebe hemi wan maret man, mama hemi save kilim tet bebe long bel, man o woman hemi kat wan narafala patna aotsaed long maret blong hem, mo kosem ol nara bigfala problems tu long komuniti.

Gudfala rod hemi minim se plante man bae i usum rod, taem mo man i usum rod i minim se komuniti hemi save kasem evri negatif problem olsem HIV /AIDS.

## Ki tinting

- Sapos yu stap kat wan patna aotsaed long maret blo yu, mas stopem kwiktaem.
- Gudfala rod i minim plante pipol oli save muv araon mo save kat kontak wetem difren grup blong ol man mo woman. Komuniti i save kasem ol sik blong STI mo HIV/AIDS.
- Sapos yu kivim watu iko long wan komuniti memba blong silip wetem hem, bambae PWD i stopem kontrak blong yu.
- Tingting gud long wanem yu mekem mo hu yu jusum.







Epau River, Efate Ring road



# Klaemet Jenis mo Disasta Manejmen

## Konten

- Wanem i save happen long ol rod, brij mo kalvet folem klaemet jenis.
- Risalt blong Natjural disasta long rod, brij mo kalvet
- Flad mo si level raes mo hao blong manejem.
- Mitigesen mo adaptesen.
- Adaptesen long komiuniti.

## Ol Samting blog Lanem

- Save se klaemet jenis mo natjural disasta manejmen hemi problem blong everi ples long wol mo i happen long Vanuatu mo long ol komiuniti blong yumil.
- Save se ol polisi blong Gavman from klaemet jenis mo ol natjural disasta mo hao blong manejem.
- Bildimap save blong yu se Vanuatu hemi no sef long klaemet jenis o ol natjural disasta. Ol semak problem yumi save kasem taem yu bildim ol rod, brij mo klavet long rod.
- Bildimap save long ol teknikal tingting blong saed blong ol enjinia mo ol narafala tingting we i no nidim ol enjinia folem ol exampol blong Efate Ring Rod mo long Solomon aelan.
- Ol fasin blong sendem ol mesej we yumi save yusum long ol komiuniti long Vanuatu.

## Introdaksen

### Polisi

Tufala agrimen we Vanuatu i saenem oli singaotem *United Nations Framework on Climate Change (UNFCCC)* mo *Polisi Blong Gavman Blong Vanuatu Long Klaemet Jenis Mo Natjural Disasta*. Gavman blong Vanuatu i wantem mekem sua se wanem we yumi mekem imas daonem problem ia blong klaemet jenis long everi polisi, plan mo olgeta projek.

### Klaemet

Plante long ol kaontri long Pasifik oli safa isi nomo from ol natjural disasta we man i no mekem olgeta blong olsem hariken, longfala taem blong san (El Nino) mo longfala taem blong ren (La Nina) mo wota we isave ron mo spolem ol ples taem i ren tumas. Samfala long ol disasta ia i happen nomo taem yumi kat ol volcano i faerap, graon i seksek o etkwek, i kat taetol wef mo graon i folfoldaon long saed blong hil. Taetol wef mo graon i foldaon i save happen taem graon i seksek o etkwek.

Lokesen blong Vanuatu long “Pacific Ring of Fire” mo long “Centre of Pacific Cyclone Belt” i mekem hemi isi nomo blong Vanuatu i kasem ol natjural disasta ia. Narafala samting we i help blong Vanuatu istap fesem ol disasta tu hemi “South Pacific Convergence Zone, ENSO (El Nino and La Nina) mo olgeta bigfala hil. Tedei Klaemet blong Vanuatu istap jenis mo ples istap hot tumas, fulap ren i foldaon, plante saeklon mo level blong solwora i kam antap. Olgeta blong CSIRO (Commonwealth Scientific and Industrial Research Organisation) oli confemem ol jenis blong klaemet blong yumi thru long ol stadi blong olgeta.



Vanuatu emi stap long wan pat blong planet Earth we oli kolek “Pacific Rim blong Faea” mo long medel blong Pacific Cyclone Belt.

Emia hemi minim se yumi save safa isi nomo from ol natjural disasta olsem hariken, longfala taem blong san (El Nino), longfala taem blong ren (La Nina), etkwek, taedal wave, landslaed, volcano, hevi ren we emi kosem flad mo raf solwora we ikam so long strong win.



# 22%

blong Krin Haos Kas Emisen hemi kam long ol kaotri blong Pasifik

OECD, Climate Change Mitigation: Policies mo Processes

## Problem blong klaemet jenis long rod, brij mo kalvet

Klaemet jenis i mekem se i kat fulap saeklon we hemi mo strong (category 5) mo ren we i distebem nomol fasin we istap bildap. Hemia i save minim nomo se bambae i save gat moa drae taem long drae sison, mo long taem blong ren sison bae yumi save lukim moa hevi ren.

Taem ples i drae longfala taem tumas, bambae i save spolem ol joen blong brij, mo rod aotsaed long brij mo olgeta rod we oli putum kol tar mo konkrit antap long hem.

Taem level blong solwora i kam antap bambae solwora i kam soa moa bitim ol narafala taem we i save spolem o damejem ol brij mo rod mo mekem se i no save stap long taem.

## Problem blong Natorel Disasta long rod, brij mo ol kalvet

Vanuatu istap long wan lokesen we fulap disasta i save happen long hem olsem etkwek, taetol wef mo landslaed o graon we fuldaon long hil long taem blong etkwek o bigfala ren.

Hemi moa gud blong no bildim ol rod o ol narafala infrastrukja long eria we i bin kat etkwek long hem bifo be ol gudfala disaen mo instraksen blong bildim ol rod i save help plante.

Nasonal Disasta Manjemen Ofis nao hemi stap kodinetem ol plan blong redi from ol disasta..

## Manejem ol wota we i ron mo level blong solwota we i kam antap

Folem olgeta problem we i save happen from klaemet jenis, kam antap wetem ol tingting o solusen long saed blong enjinia blong katem daon ol problem ia o ol narafala solusen we i no nidim ol enjinia be ol komiuniti nomo blong wokem.

Olgeta tingting ia i kat; mekem brij i bigwan moa, wokem brij we istap antap moa, protektem ol saed blong brij - ples we strong wota i save wasem aot isi, wokem ol saed blong brij i strong mo kivimaot trening blong riva.

Taem level blong solwora i kam antap wetem ol strong wef, bambae i nid blong blokem ol ples kolosap long solwora wetem ol "gabion basket, sandbagging". Plante taem bambae i nid blong jenisim ples we rod i pas long hem kolosap long solwora.



Solwota emi damejem rod long Devil's Point Efate long hariken.



Solwota emi damejem rod long North East Efate long hariken Pam.



Flad long Hariken Pam emi karem ol bigfala tri ikam daon long riva mo kasem brij, long Epau, Efate.



### Mitikesen mo adaptesen

Yu mas adresem ol problem we klaemet jenis i save kosem taem yu disaenem ol niufala projek projek or yu stap ripereem ol brij mo kalvet. Blong mekem emia, yu mas mekem fulap asesmen blong faenemaot ol eria we i save damej. I kat ol prokram olsem LiDAR mo ol map we i save help. We oli disaenem ol rod oli mas plan gud from ol wota we kam antap from ol hevi ren we i save fuldaon plante long fiuja. Ol jenis i save happen long ol disaen blong lego ol wota i save flow gud nomo andanit long ol drenej o kalvet blong rod.

I kat samfala ansa blong ol problem ia we yumi save mekem mo hemi no nidim ol solusen we i kam long ol enjinia. Samfala eksampol blong ol solusen ia emi yumi planem grass long ol hill blong stoppem graon ino foldaon (landslaed) long taem blong ren, putum tabu long solwota or bush blo ol pidjin mo fish oli save kam fulap, planem ol natongtong mo ol narafala fasin blong blokem wota o solwota i no digim aot ol graon mo lukaot gud long ples we ol fis i save laef long hem mo no lego wota i wasem tumas sof mad i ko long solwota we i save kilim ol rif.

Sam moa tingting emi blong yumi gat ol gudfala plan blong disasta, hao yumi rere long disasta, mo ol fassen we yumi stap usum graon mo ol najural risos, lukaot gud long envaeromen hemi samfala long olgeta tingting o fasin we i

no nidim ol enjinia blong oli faenem ol ansa blong hem

### Hao komiuniti hemi save jenis blong rere long Disasta

Tekem olgeta komiuniti oli pat blong olgeta projek mo kivim ol infomesen long olgeta tru long olgeta Provinsol Kaonsel, ol Kaonsela, ol jif mo ol narafala lokol komiti blong disasta.

Long taem blong disasta, mek sua se yu, putumaot olgeta saen olsem saen blong no spid tumas, saen blong slo daon, saen blong wota i ron bigwan, saen se rod mo brij i blok moa ol narafala saen.

Enkarejem olgeta komiuniti blong oli tekem pat long ol wok mo no enkarejem blong oli spolem ol strakja we istap.

Manejmen blong ol wota zon: Lukaot gud long ful eria blong wota o ol riva stat long ples we sos blong wota istap long hem mo lukaot gud long ol aktiviti we oli save help blong spolem ol wota blong yumi olsem fasin blong fidim ol buluk, katem tumas wud mo samfala moa.



## Ki tinting

**Yu gat wan plan istap blong:**

- Taedel Weiv?
- Etkwek (graon i seksek)?
- Landslaed (graon i foldaon)?
- Volcano e faerap?
- Hariken?
- Flad (Riva i kamap)?

**Spos yu lisen lo radio mo igat wan yelo alert we oli talemaot from wan hariken istap kam, plis yu no ko mekem ol wok long rod.**



Solwota i damejem rod during long Hariken Pam long 2015 long Epau, Efate Ring Rod.





Tanoliu komuniti long Efate Ring Rod



Lelepa komuniti long Efate Ring Rod



# Appendix

---

## Akronim

<b>AIDS</b>	Akwaed Imiun Difisiensi Sindrom
<b>CBC</b>	Komuniti Bes Kontrak
<b>CEDAW</b>	Konvensen Blong Endem Eni Kaen Diskriminesen Akensem ol Woman
<b>CRC</b>	Konvensen long raet blong ol pikinini
<b>CSIRO</b>	Komonwel Saentivic mo Indastrim Risej Okanaeseses
<b>DEPC</b>	Dipatmen blong Envaeromen, Protekses mo Konseveses
<b>EIA</b>	Envaeromen Impak Asesmen
<b>HIV</b>	Human Imiun Vaeres
<b>MIPU</b>	Ministri blong Infrastrakja mo Pablik Utiliti
<b>NDMO</b>	Nasinol Disasta Manejmen Ofis
<b>NSDP</b>	Nasinol Sastenebol Developmen Plan
<b>PCPO</b>	Provinsol Komuniti Patnasip Ofisa
<b>PEA</b>	Priliminari Envaeromen Asesmen
<b>PWD</b>	Pablik Woks Dipatment
<b>STI</b>	Sexual Transmitted Infeksen
<b>UNFCCC</b>	Unaeted Nesen Fremwok Konvensen blong Klaemet jens
<b>WH&amp;S</b>	Helt mo Sefti long wokples



## Mining blong sam wod

<b>Adaptasen</b>	proses blong akseptem jens o hemi hapen from klaemet jens o wan najurol disasta.
<b>CRC</b>	wan konvensen we oli mekem long 1989 long saet blong raet blong wan pikinini mo hem i stap talem se wan pikinini hemi eni wan we i no kasem 18 yia yet.
<b>Disabiliti</b>	wan man we hemi gat fisikal o mentol kondisen we i mekem se hemi no save muvmuv gud, afektem ol senses blong hem o no save mekem gud ol nomol aktiviti.
<b>EIA</b>	proses blong evaluatem ol envaeromen impak blong wan propos rod projek mo hemi lukluk tu long ol gud saed mo rapis saed blong ol socio-economic, kaljural mo ol helt impak long ol man.
<b>EI-Nino</b>	Klaemet jens we i stap afektem ol eria kolosap ikweta long pasifik rijen we yumi save luk taem ples i hot tumas, pua nutrien wota we i sta kam long not blong Peru mo Ecuador espeseli long let Disemba.
<b>Jenda ikwiti</b>	fea tritmen blong woman mo man
<b>Helt mesa</b>	ol mesa o kaed we yumi mas konsidarem long ples blong wok blong mek sua se helt blong ol wokman i gud oltaem.
<b>La-Nina</b>	Wota hemi stat blong kolkol long ol eria long pasifik we i stap kolosap ikweta mo hemi save hapen eni taem mo hemi pat blong ol jenis long weta kolosap olsem El nino be hemi long wan smol eria mo damej hemi smol.
<b>Leba Bes Wok</b>	ol wok blong rod we i no nidim masin be oli yusum ol lokol leba nomo.
<b>Mitikesen</b>	Ridiusum ol impak blong ol najurol disasta long ol komuniti.
<b>Opereta</b>	Ol draeva blong ol hevi masin blong wokem rod.
<b>PEA</b>	wan priliminari analysis long envaeromen blong identifiem ol impak blong propos rod constraksen.
<b>Kwari</b>	wan ples we oli stap dikim ston o nara materiel blong yusum blong mekem rod.
<b>Skawa jek</b>	wan traeankol strakja we oli yusum olsem wan Jek dren blong stopem wota blong no damejem rod mo wok blong hem i blong slowem daon wota mo kolektem ol toti. Jek dam hemi wan smol samting nomo we oli mkekm long ston, bag we fulumap smol smol ston, bag sanbis, etc.
<b>Trafik saen</b>	Ol saen we oli printim long ol bana blong givim infomesen, instraksen o woning long ol draeva.
<b>Stael blong wok we i no sef</b>	Ol stael blong wok we hemi save givim kil o hemi denjares long wan wokman o wan man we i pas long rod.
<b>Sefti long ples blong wok</b>	Sefti, helt mo welfea blong ol wokman o komuniti long taem blong wok.

---

## Pablik Woks Dipatmen

### Pablik Woks Dipatmen (PWD) Offices

#### **PWD Head Office**

Nasituan Building  
George Pompidou Area  
PMB 9044  
Tel: 22888

#### **PWD Shefa - Workshop and laboratory**

Private mail bag (PMB) 9044  
Tel: 22555

#### **PWD Malampa**

Lakataro Office  
PO Box 9  
Tel: 48490  
Fax: 48497

#### **PWD Penama**

Saratamata Office  
PO Box 240  
Tel: 38825

#### **PWD Sanma**

Luganville Office  
PO Box 147  
Tel: 36316

#### **PWD Tafea**

Isangel Office  
PO Box 26  
Tel: 88689

### Provincial Administration Offices

#### **Shefa Provincial Council**

PMB 9062  
Tel: 22752  
Fax: 22785

#### **Malampa Pronvincial Council**

Lakataro Office  
PO Box 22  
Tel: 48491

#### **Penama Provincial Council**

Saratamata Office  
PO Box 8  
Tel: 38348

#### **Sanma Provincial Government**

P.O.Box 239  
Luganville  
Santo  
TeL: 36712

#### **Tafea Local Government Council**

Isangel Office  
Tel: 88664  
Fax: 88638

#### **Torba Provincial Government**

P.O.Box 13  
Sola  
Vanua Lava  
TeL: 33500



---

## Ki kontakts

### Vanuatu Women's Center

PO Box 169  
Tel: 25764  
Fax: 22152

### Vanuatu Police Station

IGOV 33600  
PMB 9014  
Port Vila  
Tel: 22222

### Malampa Police Station

Lakatoro, Malekula  
Tel: 48408

### Sanma Police Headquarters

IGOV 33770  
PO Box 118  
Tel: 37130

### Luganville Police Patrol

IGOV 33690  
Luganville, Santo  
Tel: 36222

### Tafea Police Station

IGOV 5637010  
PO Box 34  
Lenakel, Tanna  
Tel: 88658

### Penama Police Station

Saratamata, East Ambae  
Tel: 38362

### Ministry Justice Disability Desk

IGOV 33610  
PMB 9084  
Port Vila  
Tel: 24845

### Tafea Judicial Services

Tel: 88622  
PMB 9041  
Tanna

### Sanma Judicial Services

PMB 274  
Luganville, Santo  
Tel: 36457

### Ministry of Climate Change

PO Box 306  
Tel: 29594

### Department of Labour

PMB 9022  
Port Vila  
Tel: 22610

### Sanma Labour Office

IGOV 33740  
PO Box 3  
Tel: 36335

### Ministry of Health

IGOV 33081  
PMB 9042  
Tel: 22512

### Lenakel Hospital

Lenakel, Tanna  
Tel: 7100156

### Norsup Hospital

IGOV 33875  
Norsup Malekula  
Tel: 48410

### Penama Provincial Health

Lolowai, East Ambae  
Tel: 33080

### Northern District Hospital

IGOV 33840  
PMB 9006  
Tel: 36345

### Department Of Environmental Protection And Conservation

Tel: +678 25302  
IGOV 33430  
PMB 9063  
Port Vila

## **PUBLIC WORKS DEPARTMENT**

Nasituan Building  
George Pompidou Area  
Port Vila, Vanuatu  
PMB 9044  
T: 22888

